

115 年全國語文競賽臺中市複賽臺灣原住民族語言朗讀文章 【卡那卡那富語】 國中學生組 編號 1 號

poisua mupana'ũ taniarũ 'ũna

miaa miana miana miana ia, mamane mita 'ũna kani urucin taniarũ.
urucin taniarũ pupuiri arapipiningi. imua tantaniara maciasũ, 'akia mapitũ'ũ.
cau mesua tamna siacũvũrũ, cucuru muru'inasũ. ka'anũ tavarũ'ũ tia
nukanmana aramia'ũ? tia nukanmana putukio? tia nukanmana tarasangai?
marapusu mamane mesua, 'akia cau tavarũ'ũ tia makananu nuari.
'ũna tacini nanmarua, Parumaci kisũũn. takacicini kamanũngũ tatia
rupacũ. kesoniũn cina in, neni tia kamanũngũa musu? marivari Parumaci, tia
maku pana'ũn ucani taniarũ. makasi cina: "noo cucuruin tũni pana'ũn ucani
taniarũ, manasũ tia aramanũngũ cau tamna siacũvũrũ." aranai mesua
matiananai cu mati'arangu maringuna karu mataa capuku 'uringi.
kamanũngũ pa macasũ tarisi. kiriũn kee tarisi isua na 'ucu tanasa.
marisũ'ũrũ marivici na tia tukusaa kee, aracan cu na taniarũ. monangu 'inia
maritarũ. ararakau cu taniarũ! urunguũn kee 'angici cumai
papanapa. 'urupaca nikamanũngũa kee rupacũ mupana'ũ taniarũ.
musucũkũcũkũ na taniarũ sua vuru. makacang nguain masutavũrũ na
canumu. surumu niarapitũ'ũ mamane 'ũnai! mukurũ cu tarisi sua Parumaci,
matisapusapu pui'i tanasa. mama'ari sii mata'uru cina in mati'arangu

maringuna karu. makacang matu'apuru, tũni cu Parumaci 'apaica sinangu
isua makacũkũna tanasa.

miaa koo pana'ũn sua taniarũ, urucin taniarũ mesua, vanai sii maciasũ
kavangvang sua taniara, muru'inasũ cau cumacũvũrũ. masini nipana'ũ cu
ucani, nakai sua cucumeni ucani taniarũ, ma'icũpũ cu arapipiningi, makasua
niara'akia cu ciasũ sua mamane 'ũnai.

mapitũ'ũ kavangvang, nimiaranau makasua, marivivini 'apu'iarũ cu
taniarũ arapipiningi. sua nipana'ũa taniarũ ia, koo mamacai. nakai
nimiaranau musucara'ũ, ka'anũ cu tatia nguain tamna sinangu. sua cũ'ũraa
mita masini vuanũ ia, nguai sua napana'ũa mesua taniarũ.

sua nipana'ũ taniarũ nanmarua Parumaci isua ia, cucuru putucauũn cau
Kanakanavu, patanganaiũn cu Naparumaci kisũũn. noo tiain marisusuna
nguain tamna nganai ia, tia mata'uru musũ'ũ putucau kari Na- misee. sua
matanganai makasia ia, Kanakanavu tamna niurina.

射日傳說

遠古時宇宙有兩個太陽輪流出現，每天都是白晝沒有夜晚，當時的人類生活很困擾，有位名為 Naparumaci 的青年自製大弓箭，跟母親說，他要射下一個太陽。還製作很長的繩索，把繩子拴在家裡，拉到接近太陽的位置。當太陽出現時，立即脫下熊皮披風，用大弓箭射向太陽。大地突然變暗！他握著繩索摸索回家。太陽被射下一個，另一個太陽也懼怕出現，過了很久，另一個太陽才慢慢出現，被射的太陽因流血過多光源減弱，如今的月亮，就是當時被射的太陽。